



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim


ig tir_yimiyim

yt tir yimiyim

TAPAK 8

Russia-i intercontinental ballistic missile ka tendangogo

Zoravar India indang Asiad Squad nung mali



VOL. XXIII ISSUE NO. 210 (ADOK 210) DIMAPUR YANGTEPNÜ (THURSDAY) MONUPII (MAY) 14, 2026 ₹ 5.00

Dr. Rio & NBCC-i arogo lennirtem tepsetba aitsür Mokokchung LADP Common Pool 2025-26 nungi tzü filter (RO) 5 tenla

Dimapur, May 13, 2026 (TYO): Chief Minister Dr. Neiphu Rio-i Manipur nung arogo lennirtem tepsetba khukhua aitsüogo.

Tai maketba nisungtem dak iba ama tesempatsü aser mebilemdangi inyakba mapa ya magizüker aser temetetertem aliba loktiliba nung kodanga magizüksü ta Dr. Rio-i ashi.

"Iba tatalokba atema temulung raksar aser tasür kibongtem, arogopurtem aser Manipur nung alirtem den asükhu lemsateper. Iba lending ajanga takoksa ajururtem asoshi tashi aser tesünap meshia sarasademer" ta Dr. Rio-isa metetdaksüogo.

Nagaland Baptist Church Council (NBCC)-ia tanga sangdong ka nung iba tesempatsü

mapa aitsüogo aser iba ya tamangertem amakba lir ta shiogo.

"Onoki kecha tarendakba melii iba mapa aitsür. Meimchir taküm ka agiba ya Tsüngremer ozüing alema lir aser Pa mesüka yangluba nisung anema inyakba lir" ta NBCC-i ashi.

NBCC-isa bangdakpurtem dang jungjunga bushisüngdang asütsü aser aibelenertem pua ozüing tapet agi merenshia takoksa ajurur nem temeten agütsütsü ayongzükogo.

"Kasa mapang onoki mangyimba kin dang tayang meküpzüksü saka Tsüngremer temeten nung aser Pai shimetba ketdangpurtem dak temulung alemtsü ayongzük" ta NBCC-isa metetdaksüogo.

Mkg DPDB-i class 10 & 12 nung alakteta takok angurtem tushi

Mokokchung, 13th May, 2026 (TYO): 13th May, 2026 nü Mokokchung District Planning & Development Board (DPDB)-i Mokokchung district nungi 2026 küm NBSE-i agiba class 10 aser 12 tatidang nung tangar dang nungi alakteta takok angurtem nem tetushi agütsüba sentong tongmelang ka yangi Mokokchung DC conference hall nung ayongzükä kaogo.

HSLC (class 10) nung top 20-i airtem; Top 8-Immayangla (St. Mary Residential School, Alichen), Top 19-Lipoklemla Jamir (Ladybird School Mokokchung), Top 19-Temsukumla Imchen (Queen Mary Hr. Sec. School, Mokokchung), Top 19-Benjongsenla (Baptist Hr. Sec. School, Mangkolemba), aser Top 20-Akumtola Jamir (Christian Standard Hr. Sec. School, Changtongya) parnok liasü.

HSSLC Science Stream nung tajungtiba asem -Moaakum T. Longkumer (Mayangnokcha

Govt. Hr. Sec. School, Mokokchung), Chendila Walling (Queen Mary Hr. Sec. School, Mokokchung) aser Anadil Raza (Mayangnokcha Govt. Hr. Sec. School, Mokokchung) liasü. Arts Stream nung tajungtiba asem- Roshni Kumari Gupta (Queen Mary Hr. Sec. School, Mokokchung), Lanusanen Jamir (Govt. Hr. Sec. School, Tuli) aser Monyu (Mayangnokcha Govt. Hr. Sec. School, Mokokchung) liasü.

Commerce Stream nung tematiba jenjang asemji par pezüü agizük aser parnok ajak prongla Mayangnokcha Govt. Hr. Sec. School, Mokokchung nungi dang lir. Senpet agizükertemji - Chubatila Pongen, Tongtisangla, Susangienla M Jamir aser Sano Maya Gurung liasü. Susangienla M. Jamir aser Sano Maya Gurung nadi percentage kasasa angu. Takoker nem senpet sen den kulikaket agütsü aser ibaji MLA & DPDB Chairman, Nuklutoshi ket nungi agüja liasü.

(Maneni tapak 2 nung...)

Arogo lennirtem tepsetba aitsür: NSCN/GPRN

Dimapur, May 13, 2026 (TYO): Kotlen aser Kotzim tsüingda Thadou Baptist Association arogo lennir asem amakba aser tepsetba atema aoksar aser temulung raksar ta MIP, NSCN/GPRN-i metetdaksüogo.

Parnok ya hadir kecha mabenba civilians dang masü saka nübertemi kanga akhümtsübuba arogo lennirtem liasü ta MIP sangdong ka nung ashi.

Tasür kibongtem den asükhu lemsar aser iba mapang parnok tashi aser tesünap ngudakjang ta sarasademer. Iba tesempatsü mapa onoki khukhua aitsür aser bangdakpur dang aibelenertem maitsü jangjatsüsa bushisüngdang asütsü mepishir

ta MIP, NSCN/GPRN-isa ashi.

Kuli mejangja ser telok kari telok kar dak tai tongloksüba atema sasaa bilemer. Shibai metet telok kari tai maketba takütem lulaba nungi tajangzük agitsü meranger asütsü akok. Kuki telok kari tensa tamajungba küm daksütsü mulung lir ta ibala inyakim ajanga kuli agütsür ta MIP-isa metetdaksüogo.

NSCN-i yimjung, kati ka akhümtsübutep aser kin ajak putepa alitsü atema noktaker. Tensa mejungi aliba mapang ka tebilemstü khuret mebeni tai tongloksüba aser küpkzüksü tayongzükbatem ajanga telemsa tuluba akümtsü aser timtemba manentsü ta MIP-isa metetdaksüogo.



Mokokchung DPDB-i LADP 2025-26 Common Pool nungi tenlaba tzü filter (RO) ka IMDH Mokokchung nung MLA & Mokokchung DPDB Chairman, Nuklutoshi-i lapoktsüdang tangokba noksa nung angur. Mokokchung, 13th May, 2026

Mokokchung, 13th May (TYO): Dr. Imkongliba Memorial District Hospital (IMDH), Mokokchung nung 13th May nü tzü filter (Reverse Osmosis) ka MLA & Mokokchung District Planning and Development Board (DPDB) Chairman, Nuklutoshi-i lapoktsüogo.

Kasa filter-ji DC office, Ao Senden office, Circuit House/

Guest House aser S.P Office nunga agütsüogo. Item tzü filter-tem ya Mokokchung DPDB-i LADP 2025-26 Common Pool nungi alia agütsü.

MLA Nuklutoshi-i iba tzü filter lapokja mapang tatsüka agidang, tzü ya meimchir asoshi kanga dang nungdakba ka lir, iba ya mapa tila ka amai, saka iba ajanga jentipur ajangzüksü imlar, anungji, teyujena

Kangpokpi nung arogo lennir 3 tepsetba sülen tensa mejungi kümoggo

Imphal, May 13, 2026 (Agencies): Manipur nung Bodbarnü Kangpokpi district kübok Kotzim aser Kotlen yimtsüngtem tsüingda Kuki-Zo arogo lennir asem tepsetba sülen nübertemi lungkak aiter aser district ajung mokdangogo.

Iba mokdang ya Sadar Hills nung teloktemi ayongzük aser parnok nisung tepsetba aitsür aser temeten meshir.

Kuki Students' Organisation (KSO), Churachandpur den Thadou teloktemi May 13, 2026 nikongdang 12:30 ako nungi mokdang ayongzükogo.

Iba tatalokba sülen Kangpokpi district ajungalen security forces taliba mapa lemkzüksüogo.

Iba lapi aser taochi maliba inyakim nung arogo lennir asem- Rev. V. Sitlhou, Rev. Kaigoulen aser Pastor Paougoulen nungertepset. Iba tatalokba nung nisung aika kanga mejungi yirua lir ta Kuki Inpi Manipur (KIM)-i metetdaksüogo.

Rev. V. Sitlhou-i tawa tu Nagaland Joint Christian Forum den külemi Kohima nung peace mission nung shilem agia liasü. Iba ya Kuki-Zo aser Tangkhul nungert tsüingda putepshitsü aser kati ka angatetteptsü atema liasü ta KIM-isa ashi.

Yimjung atema noktaker ka tepsetba ya tang putepshitsü atema inyakba maparen amakba lir aser India sorkari jungjunga bushisüngdang asütsüla ta KIM-isa ashi.

NSCN-IM züngsemtemi Zeliangrong United Front (ZUF) den külemi Kuki nungert arogo lennirtem amak. Parnok ya Churachandpur nungi Kangpokpi-

i senden ka nung adentsü atema aodang amak ta Kuki Organization for Human Rights Trust (KOHUR)-i tai tongloksüogo.

Iba teshimtet telok nung Thadou Baptist Association (TBA) aser United Baptist Council (UBC) nungi arogo lennirtem dena liasü. Parnok ya prangpong-injang mabenba tamangba yimsü lennirtem liasü aser parnok yimjung maparen nung shilem agia aru ta KOHUR-isa metetdaksü.

Iba ya Kuki nungert yimjung maparen amakba lir aser India security forces-i Churachandpur-Kangpokpi lenmang nung Kuki-Zo civilians kümzükä meyuteter ta KOHUR-isa ashi.

KOHUR-isa iba mapa inyakertem anema anti-terror laws kübok ken o tem benoktsü, NSCN-IM den ceasefire inyakim repringshitsü, high-level judicial commission ka tentetsü aser Kuki-Zo nungert alidak Central security forces taliba mapa lemkzüksütsü takhangba agütsüogo.

Parnokisa Vatican, World Council of Churches, Baptist World Alliance aser National Council of Churches in India dena Khristan teloktemi iba tatalokba aitsütsü aser teputep adoktsü atema inyakba arogo lennirtem tepsetba anema inyakba aitsütsü ayongzükogo.

Bodbarnep Kangpokpi district kübok Kotlen aser Kotzim tesemtem tsüingda tai maketba civilians asem tepsetba aser pezü yirutsüba khukhua aitsür ta Manipur sorkari metetdaksüogo. Iba lendong nung yirur

amshitetsüsa kanga junga anepaludaktsünür, ta mepishia ashi. Tarutsü nunga akokba lenmangtem nung yariteptsü mulunga lir, ta paisa shisem.

Mokokchung DC, Ajit Kumar Verma-ia mapang tatsüka agidang, tesem pungu nung tzü filter agütsübaji tongtibangsa item nung nübur jenti tesem balala nungi adenshir, nübur ajak saku masü, koda masürtema lir. Tzü ama nungdakba yabo sarkaria agütsütetsüla aser aji sarkar mapa lir, anungji, DPDB chairman MLA Nuklutoshi-i iba mapa inyaktsü shisatetba asoshi pa danga pelar ta metetdaksü.

Iba mapa ya nübur rangben tajangzük anguba mapa ka dang masü saka iba ajanga alima tzü mopung kümzükba nunga shilem agir ama asütsü, kechiaser tzü ya plastic bottle nung dang seper ayoker aser tanü plastic yagi alima janar, anungji, iba ajanga plastic amshiba terayong ajemdaktsütsü imlar. Ya mapa tila ka amai saka yangi tajangzük tulu sentaka lir, ta paisa shisem.

(Maneni tapak 2 nung...)

rongnung par asem Shija Hospitals and Research Institute, Imphal nung anepalutsü atema anir ao.

Manipur Chief Minister Yumnam Khemchand Singh den Deputy Chief Minister Losii Dikho, Home Minister Govindas Konthoujam, MLA tem aser sorkar ketdangsürtemi Shija Hospitals semdanga osang metetpelaogo.

State sorkari yirua alirtem indang medical expenses agütsütsü aser parnok tajungtiba nung anepalutsü tetuyuba agütsür ta Chief Minister Khemchand-i ashi.

Külen, Naga People's Organisation-i tensa mejungi akümba ajanga Imphal-Senapati Highway (NH-2) nung public mesenzütsü metetdaksüogo.

Manipur nung United Naga Council (UNC)-ia Thadou Baptist Association Church lennirtem amakdang nisung asem tepsetba aser pungu yirutsü aitsüogo.

UNC-i tasür kibong ajak den mangyimba osang lemsateper aser iba temulung zürepba mapang tashi aser tesünap meshia sarasademtsür ta ashi.

Iba tatalokba sülen Leilon Vaiphei Kuki village nung alirtemi Konsakhul village nungi Naga nungert 20 tashi pur ayuba atema tebilemstü abener ta UNC-isa metetdaksü.

Yimdaklirtem pua ayuba ta magizüker aser tai maketba civilians dak tenük yoka inyakba ya tangatertem aliba loktiliba inyakshanghi alema lir. Iba inyakim ajanga kin o kin tsüingda mepetmesü tuluba akümtsü ta UNC-isa ashi.

Parnokisa yimdaklirtem tatemzükba kecha melii chioiktsü mepishia metetdaksüogo.

NFMP-i Dimapur nung workshop ayongzük

Dimapur, Monupii/May 13 (TYO): Department of Environment, Forests and Climate Change, Government of Nagaland kübok JICA teyari nung Nagaland Forest Management Project (NFMP) ajanga May 12-13, 2026 anogotem SEFTI, Dimapur nung 'SHG Livelihood Scale-Up and Market Linkages' indang workshop ka ayongzük liasü.

NFMP ya primary activities aliba nungi SHGs indang asadantetsü akokba cluster-based secondary activities kumdahtsü asoshi aser 'institutionalized management frameworks aser market linkages' ajanga teti asoshi timtem majurui ajak ajangzüksü lenmang bushitsü nükjidong nung iba workshop ya ayongzük liasü.

Iba workshop tenzükba session nung Temjenyabang, IFS, CCF & Project Director

(AFP), NFMP ajanga shilem agirtem pela agizük aser Project indang livelihood component tashi itshtsü atema 'field implementers' nungi shisa tajung agütsü ayongzük liasü.

Iba Project ya ajanga livelihood component densema components ajunga nem ajaklen teyari agütsü tangatetba nung lir, koba nüburttem rongsenketzung terenlok tajungba kumdahtsü shilem tongti agir, ta pai ashi.

Pai shilem agir ajunga dang iba temelenshi asoshi lenmang yanglutsü atema pei ajangshibatem lemsateptsü ayongzük liasü.

Arem wazüka ayutsü nükjidong dak alaka iba Project ya "NFMP Brand" tenzüksü nükjidong lir ta pai ashi.

Workshop nung M. Senthil Kumar, IFS, Addl. PCCF &

Chief Project Director, NFMP ajanga jembidang iba Project ya district 11 nung aliba yimtsüing 185 aser SHGs 440 tongogo aser Revolving Fund teyari ajanga sen crore ana dak tema lema agütsü aser iba nungi SHGs temi sen crore trok dak tema ajangteta tajangzük sen crore 2.4 liasü, ta ashi.

Project ya final phase anasa lir, anungji clusters aser state level nung federation tenteta livelihood maparen tali inyakba nung rangloktü nungdaker, ta ashi.

Pai shilem agirtem dang Project inyaksü küm ana anünga aliba atema lenmang sayuteptsü ajungshia liasü.

Shailendra, Livelihood Expert, PMC, NFMP ajanga Project kübok 'livelihood promotion' indang PowerPoint presentation agüja liasü.

Iba workshop nung NFMP kübok DMUs 11, FMUs aser FNGOs nungi nisung 70 adenshia shilem agia liasü.

Longjang nung black pepper tezü lema agütsü

Dimapur, Monupii/May 13 (TYO): Kozü tsünüba den külemi black pepper tsünüba yimya ajungkettsü nükjidong nung Khutak Valley Organic Producer Company (KVOPC) ajanga May 7 & 8, 2026 anogotem Longjang yimdak aluyimer nem black pepper tezü 30,000 lema agüja liasü.

Item black pepper tezüttem ya MLA & Advisor, Law & Justice and Land Revenue, T.N. Mannen-i tenlaba alitsü.

Kozü farming den ano sen lenmang tali bendenloktü atema black pepper tsünüba yimya amshidaktstü atema aluyimer ajungmesoa iba mera ya agia liasü. Iba black pepper

tezü lema agütsüba sentong nung Longjang Village Council chairman Nungshi Aier aden aser pai tetenlar aser KVOPC dang aluyimer yariba asoshi pelaba lemsatepa liasü.

Paisa aluyimer tem dang pei ajangzüksü mechi black pepper tezü tem kanga junga anepalua amshitsü ayongzük liasü.

Kohima Municipal Council-i A.G. Colony leper anepalutsü

Dimapur, Monupii/May 13 (TYO): A.G Colony, Ward-15, Kohima nung aliba leper anepalutsü atema Deputy Commissioner, Kohima office nung May 4, 2026 nü senden ka amenba sülen Kohima Municipal Council (KMC) nem agütsüo.

Iba senden ya Deputy Commissioner Kohima, B. Henok Buchem, NCS lenisüba kübok amen, kong KMC nungi ketdangsürtem, A.G. Colony Council, Sazo Kiso'er kinungertem aser District Revenue Administration nungi

dena liasü. Nüburttem aginüba ama aser A.G. Colony aser Ward-15 nung alirtem mechi iba leper anepalutsü mapa KMC nem agütsü telemetba ya agia liasü.

Iba sülen May 13, 2026 nü KMC Office, Kohima nung Kohima Municipal Council aser Sazo Kiso tsingta tezülutepba ka renema liasü. Iba tezülutepba nungya, 'tang nungi tenzükba A.G. Colony nung aliba KMC Public Graveyard dak sendakba inyaksangshi ajak KMC-i

anepalutsü,' ta shia lir.

Iba tezülutepba nungya KMC Chief Executive Officer Alemyapang Longchar, NCS aser Sazo Kiso nati telok anatsülen nungi kuli lia meyongnem agüja liasü.

Iba tezüngzüktep nungya Sazo Kiso-i nüburttem mechi iba tesem küm aika anepalua aruba asoshi pelaba shia lir. Maneni Land Revenue Department ozüing nung aliba ama KMC ajanga nungdakba mera agia tang nungi tenzükba iba ali anepalutsü, ta zülutep.

Mkg DPDB-i class 10 & 12 nung alakteta... (TAPAK 1 NUNGI...)



Mokokchung district nungi class 10 & 12 tatidang nung alakteta takok angurtem nem Mokokchung DPDB-i tetushi agütsüba sentong ka Mokokchung DC conference hall nung ayongzük akadang tangokba noksa nung angur. Mokokchung, 13th May, 2026

Iba den külemi Mokokchung district kübok town council balala nung temerükta ward-tem shima senpettsü. Mokokchung Municipal Council kübok temerükta ward-ji Alempang, tanabubaji Salangtem aser tasembubaji Kichutip liasü. Changtongya Town Council kübok mezüingbuba jenjangji PWD ward aser tanabubaji Church ward liasü. Tuli Town Council kübok Longpong ward-

i mezüingbuba aser tanabuba jenjang nung Aitlenden liasü. Mangkolemba Town Council kübok Satihit ward-i mezüing jenjang angu aser tanabubaji Hokiyong ward liasü.

Mokokchung DPDB-i iba ama mapa inyakba ya ibai mezüingbuba asütsü aser iba yagi onok kanga ajungshir, anungji, iba mapa yabo tarutsü nunga maneni inyak nung junger, ta All Ward Union Mokokchung Town

(AWUMT) Tir aser Alempang Ward Chairman, Wb. Lemasashi-i osangbenertem den jembidang pelaba metetdaktstü.

Iba sentong nung Mokokchung Deputy Commissioner, Ajit Kumar Verma IAS-i anir Mokokchung District Planning and Development Board (DPDB) züingsemtem, municipal & town council nungi yimsüsür, ward ketdangsürtem aser osangbener densema liasü.

PCM tesayur Dr.Obendanglai ACSS senden nung jembidi

Mkg. May 13 (TYO) : People's College Mokokchung nung tesayur Dr.Obendanglai (Ungmatsür), La Japan yimtiba Tokyo nung The Asian Conference on Social Sciences (ACSS-2026) sentong May 12 nü akadang, 'Peripheral Slavery and Global Abolition : Locating the Naga Hills in Indian Ocean Histories,' onük nung jembidia liasü.

La ya iba mungdang nung International Academic Forum (IAFOR)-i shimba o jembirtem rongnung ka liasü. Lai jembiba onük nung mungdang nung adenertem ajaki jangratema agizük o lempet tajung agia liasü. "Alima nung shisaluyimba wadang nung IAFOR ama takoktet teloki parnok sabang



Dr.Obendanglai

nung shisalemsateptsü jaokbaji maongka tulu lir aser iba maongka tuluji tesayur Dr.Obendanglai ngutetbaji asen kin asoshi nümadangtsü mapa ka asütsü," ta tepela aser tenüngsang o ka lar kaketrejusangertemi metetdaktstüo.

NSCN/GPRN-i Tatar ka mapa nungi anentsür

Dimapur, Monupii/May 13 (TYO): Ministry of Kilo Affairs nungi osang aruba nung ajemdaker aser fact finding committee osang asadanger Tisary Region künok Hutsu Village nungi Achumu APfithu, Tatar, S/o L. Achipa ajanga Yehzabo nung aibelenba mechi

Active National Service nungi anentsür, ta NSCN/GPRN sangdong ka ajanga ashi.

Ato Kilonser indang office nungi iba totuyuba agütsüba nung Achumu A Pfithu mapa nungi anentsüba ya tang nungi tenzükta ta shia lir, ta sangdong ajangasa ashi.

Kohima Police-i nisung ana pua lir

Dimapur, Monupii/May 13 (TYO): Kohima Police ajanga sangdong ka nung, tim masüba mapa inyak ta ken o aruba sülen Women Police Station nung ken o ka zülüoka lir, ta ashi.

Iba ya May 12, 2026 nikongdang 7:30 ako meta mejangjaba nisung ka Kisama nung iba timtem ajurur alir tetsür ana ki telungi aita atalok.

Tena chiyonga aliba mapang nisungba yagi tena merenshia tashiyim amshia shi nung medemtsü merang, ta ken o agütsüba nung ashi. Iba mapang tetsür ka kanga sashia yirua temang anepalutsü asoshi Bethel Hospital-i anir ao, ta Kohima Police-i ashi.

Iba complaint nung ajemdaker Women Police Station, Kohima nung Bharatiya Nyaya Sanhita (BNS) aser Protection of Children from Sexual Offences (POCSO) Act, 2012 indang ozüing balala kübok ken o ka benokogo.

Tai tonglokja alisang ya Phesama village nungi arishi küm 28 tain Seyienei-u ta

jangjaogo aser police temi pua lir.

Iba tatalokba bushisüingdangba mapang lir aser ozüing agi melaba ama tapet mera agitsü. Nüburttem dang police den amalitep akatsü aser osang mejangja meporokshitsü mepishir, ta Kohima Police ajanga ashi.

Maneni dumper truck kati Jakhama village nung motorcyclist ka menüingset ta May 13, 2026 anepdang 7:20 ako meta telephone ajanga osang ka aru. Osang aruba sülen duty nung alirtemi iba dumper truck ya PHQ point nung menepa soit.

Iba tatalokba dak sendakba nung truck driver ya police-i pua lir, ta sangdong ajanga ashi.

Menüingsetsang motorcyclist ya Viswema village, Z Khel nung alir arishi küm 30 tain Viboto Hibo ta jangjaogo. Iba tatalokba indang bushisüingdang tenzükogo aser ozüing agi melaba ama mera agitsü, ta Kohima Police sangdong ajangasa ashi.

Mokokchung LADP Common Pool... (TAPAK 1 NUNGI...)

IMDH tenüing nung Dr. Kilangwabangi jembidang, MLA & Mokokchung DPDB Chairman, Nüklotoshi lenisüba nung nüburttemi kanga nungdakba ka tenlaba asoshi pelar aser iba ya amshidang onoki na teti bilemtetsü, ta ashi.

IMDH nung ya Mokokchung district nüburttem dang masü saka artsü kecha mekai alima tesem balala nungi nüburttem taneptsü balala bushia arur. IMDH ya sarkar indang mozüki ka saka nüburttem meyong mozüki amai anepalur, kechiyong küm aika nüburttemi

iba mozüki asoshi shilem agia shiranger ayipdak cabin-tem, tzü atsüdak (borewell), semtu, sarasademba ki, yipden/menden aser ano nungdakba aika kija, kibong, arogo aser lokti balalai tenlaba angutsü, ta Dr. Kilangisa metetdaktstü. Mokokchung DPDB-i LADP Common Pool nungi tanü tzü filter tenlaba ya tanü tasen masü, taoba mapang nunga mapa tajung inyakba lir, ta paisa pelaba lemsatep.

IMDH Chaplain, Wabang-i iba tzü filter tasen meshiteta sarasademtsü.



May 13, 2026 nü Puducherry nunh Puducherry LG, K. Kailashnathan-i ketdangsüa NDA lenir, N. Rangaswamy nem Chief Minister tenangzükba agidaksüdang tangokba noksa nung angur. Kasa noksa nung BJP National Tir, Nitin Nabin den tangartema angur.

West Bengal CM Suvendu-i police nem tetuyuba tasen aika agütsü

Kolkata, May 13 (Agencies): West Bengal Chief Minister, Suvendu Adhikari leniba nung tensa asadanga senden ka amenba sülen Police nem tetuyuba tasen aika agütsüogo.

Sorkari 2021 küm election agiba sülen rara adokba ken otem asentenshir bushisüngdangtsü, ozüing alema kiset shiruru shibelenba mita aotsü, arrtsülen bendangertem nokdangtsü aser tekülem kitem mesüra lokti sentongtem nung loudspeaker amshiba nokdangtsü tuyu.

Sorkar ketdangsertemi police dang 2021 küm assembly election agiba sülen yimtenren dak sendakba rara adokba bushisüngdangba nung metokmeperi jenti lir, anungji item ken oji asentenshir bushisüngdangtsüla, ta tuyu.

Superintendents of Police (SPs) aser Commissioners of Police (CPs) dang item bushisüngdangbaji ketdangtsü tuyu.

State sorkarisa ozüing alema

kiset shiruru shibelenba ayokba, ozüing alema lapokba shiruru tepsetba ki aser ozüing alema lisem ayaba mita aotsü tuyu.

Sorkarisa ketdangsertem dang Animal Slaughter Control Act, 2014 kübok aliba ozüingtem shidak benoktsüla, ta tuyu.

Sorkarisa arrtsülen ozüing alema bendangertem aitba mita repringtsü aser intelligence osang lemsateptsü tuyu.

Tang nungibo Bangladesh den arrtsülen aliba police stations-i mapang shia senden ayongzükba ozüing alema inyakba mapatem asadangtsü, intelligence osang lemsateptsü aser telemetba balala agia inyaktüsü.

Police station level nung ita shia khen item ama senden amentsü aser ita asem shia khenbosa SDPO level senden amentsü. Item senden nung jembibatemi IG, IB (Border)-i tejangja record süa ayutsü.

State sorkarisa ozüing alema raraba hadir aser bomb mita aotsü. Officers-in-charge aser inspectors-in-charge dang

Malkhanas nung rizünga aliba prangpong aser injang repringshiba sülen May 15 tashi nung report tejangja agüjang, ta tuyu.

May 16 nungi tenzüka SDPOs aser DSPs-i Malkhanas mita repringtsü aser May 16 anogo nungisa ozüing alema amshiba raraba hadir aser bomb mita aotsü aser anogo shia ADG, CID nem report agütsüsü.

Kasa senden nungji traffic atema-a jembia liasü. Sorkar ketdangsertemi Traffic Wing aser local police stations dang Motor Vehicles Act kübok two wheeler anirtem ajaki merang shidak asemtsü atema ozüing shidak benokang ta tuyu. ADG, Traffic, West Bengal-i iba ozüingji benoktsü aser mapang shia osang agütsüsü.

Sorkar tasenbaisa police dang state tesem ajaklen tekülem kitem, mosques, yimsü dak sendakba sentongtem mesüra lokti sentongtem nung loudspeakers 'volume' tulu amshiba nokdangang ta tuyu.

Rangasamy-i tang agi 5benbuba Puducherry CM tenangzükba agi

New Delhi, Monupii/May 13 (Agencies): Bodhbarnü All India NR Congress (AINRC) tentetsang, N Rangasamy-i Puducherry Chief Minister tenangzükba agiogo.

Taoba ita iba Union Territory nung assembly election agi aser NDA-i takok anguba sülen pai tang agi pongubenbuba Chief Minister tenangzükba agiogo.

Lok Nivas nung Lieutenant Governor, K Kailashnathan-i ketdangsüa arrshi küm 75

Rangasamy nem tenangzükba agidaktüsü.

Pa den külemi AINRC nungi Malladi Krishna Rao aser BJP nungi A Namassivayam natia minister tenangzükba agi.

Iba sentong nungji BJP National Tir, Nitin Nabin aser National General Secretary (Organization), BL Santhosh na densema tongti lenirtem aika liasü.

Tawa Puducherry assembly election nung AINRC-i menden 12 nung takok angu aser BJP-i

menden pezü nung takok ngua liasü. Iba dak alia NDA teloktep nungsa densema aliba AIADMK aser Lakshiya Jananayaga Katchi nati menden kaka nung takok angu.

Opposition DMK-i menden pongu nung takok angu, Congress-i menden ka aser tang party tasen, TVK-i menden ana nung takok ngua liasü.

NEET paper leak asüba ya India atema maaksü tulu: D K Shivakumar

Bengaluru, May 13 (Agencies): Bodhbarnü Karnataka Deputy Chief Minister, D K Shivakumar-i, tawa NEET question paper leak asüba ya India atema maaksü tuluka lir; iba ya ajanga alima shisaliok sabang nung India nunger jenjang mejungi aliba sayur, ta ashi.

Paisa Union minister tem aser BJP MP temi iba dak sendakba nung telangzüba agütsütsüla, ta takhangba agütsü.

Tasüngdangba ka langzüdang pai, "Iba ya India atema maaksü tuluka lir. Kaketshirtem aser tsüraburtem kanga jashir aser timtemer. Parnoki kanga meranga züngogo. Tang paper leak asüba tatalokba ya ajanga alima shisaliok sabang nung asen linük tenüing menükogo. Central sorkar nung minister

tem aser BJP MP temi telangzüba agütsütsüla," ta ashi.

Bengaluru nung osangbenertem den jembidang pai, "Parnok shingaia iba dak sendakba mejembir. Iba ya taaktsüka lir. MP tem aser Union Minister temi telangzüba agütsütsüla," ta metetdaktüsü.

NEET (UG) 2026 tatidang ya May 3 nü agia liasü, ajisüka iba tatidang question paper leak asü ta tai tongloktüsü sülen CBI-i FIR ka benoker bushisüngdang tenzükogo.

National Testing Agency (NTA)-i, iba tatidang tanaben agishitsü atema taruba anogo 7-10 tsüngda anogo tasen ka sangdongtsü, ta metetdaktüsügo.

May 3 nü iba tatidang agi, saka iba taitdang tamagila kümdaktüsü sülen candidate tem kanga jashia longkak aitar.



May 13, 2026 nü Indonesia Minister for Foreign Affairs, Sugiono (ajichi) BRICS Foreign Minister tem senden nung adentsü atema New Delhi tonga aruba sülen India nunger ketdangser kati pa agizükdang tangokba noksa nung angur.

RONGDAK SANGDONGER

M/S FAIRWEALTH HOUSING PRIVATE LIMITED (UNDER CIRP) INDANG ALLOTTEES/HOMEBUYERS
 CIN: U70200HR2009PTC039709
 Hon'ble National Company Law Tribunal, Chandigarh Bench - II
 CP (IB) No. 627/Chd/Hry/2019

Fairwealth Housing Private Limited indang Registered Office ji 651-652, Udyog Vihar Phase - V, Gurgaon, Haryana, India - 122001 nung lir aser project ji Khasra Nos. 604, 605, 606, 607, 615, Village Dhiriyawas, SRO Tapukara, Tijara, Alwar, Bhiwadi, Rajasthan nung, 01.06.2022 anogo nung Hon'ble National Company Law Tribunal, Bench - II, Chandigarh-i agütsüba tetuyuba kübok tang Corporate Insolvency Resolution Process tagidak lir aser tsünglanglen sign süa alir Resolution Professional ka ama shimogo. 17.02.2026 anogo nung Hon'ble National Company Law Tribunal, Chandigarh Bench-i tetuyuba ka ajanga tsünglanglen sign süa alir dang 'claims' atema tanüngba allottees/homebuyers ajak nem asentenshir sangdong agüjang ta tuyua liasü.

Iba resolution inyakyim ya tang tagidak lir, anungji M/s Fairwealth Housing Private Limited indang Homebuyers/Allottees shirnokisa 'claims' magütsü lir, parnok ajak dang tanaben-a lepsia Form CA nung claims denji külemi 'supporting documents' ji iba sangdong agütsüba sülen anogo 14 tsüngda tsünglanglen aliba email nung agüjang ta tuyur. Metetpelatsü kar danga ali nunga Resolution Professional den iba address ajanga tongtepreteptsü akok.

Mr. Sanju Kumar Resolution Professional
 Comm Add: 707, Indra Prakash Building, Barakhamba Road, New Delhi - 110001,
 Email address: fairwealth.cirp@gmail.com

GUWAHATI ZONAL OFFICE
 1st Floor, Dwarka Center, Lachit Nagar, Sani Ram Bora Path, Bora Service, Ulubari, G S Road, Guwahati-781007,
 e-mail: legal_guw@bankofmaharashtra.bank.in

KIOJEN AGIBA NOTICE

Bank of Maharashtra nung Authorised Officer ka ama tsünglanglen sign süa aliri Securitization and Reconstruction of Financial Asset and Enforcement of Security Interest Act - 2002 aser Security Interest (Enforcement) Rules, 2002 kübok Sec. 13(12) aser rule 8 nung agüja aliba tashi amshia column no. 3 nung shia aliba anogo nung Demand Notice ka ajanga column no. 1 nung shia aliba nem apurtem/Partners/Guarantors dang Column no. 3 nung shia aliba senji Notice agütsüba anogo nungi senji agütsüba anogo 60 tsüngda agüjang, ta metetdaktüsü. Sen apurtem/Guarantors-i senji magütsüet, anungji sen apurtem/partners/guarantors aser public dang ya sangdonger, tsünglanglen sign süa aliri iba Act nung Section 13(4) aser rule 8 nung pa nem agüja aliba tashi amshia 08/05/2026 anogo nung tsünglanglen shia aliba kiojen agiadokogo, ta sangdonger.

Sen apurtem/Partners/Guarantors aser Public dang iba kiojen dak sendakba nung kecha inyaksangshi masütsü tekümdangtsü metetdaktüsü, mesüra yangi shia aliba senotsü aser sen tetemlojki **Bank of Maharashtra** nem agütsütsüsa akümtsü.

Sen apur dang iba Act nung section 13 kübok sub-section (8) nung ajemdaker mapang shidak nung item kiojen alangzüksü metetdaktüsü.

बैंक ऑफ महाराष्ट्र
 Bank of Maharashtra
 भारत सरकार का उद्यम
 एक परिवार एक बैंक



May 13, 2026 nü Pune district kübok Baramati nung nija company ka indang training agiba tayimtsü tilaka tsükokba sülen tangokba noksa nung angur.

(1) Name of Borrower(s)/ Guarantor(s) and Branch	(2) Particulars of property/ assets charged	(3) Date of Demand Notice and Outstanding Amount
Borrower: M/s Heinuo Pharmacy Proprietor- Mr. Job Kulnu	Registered Mortgage of Land measuring 872 sq. ft., bearing Patta No. 10922(P) Dag No. 3168 located in Jail Colony, PR Hill, Kohima Nagaland-797001 in the name of Mr. Zenoho Kulnu.	Date of Demand Notice: 15/01/2026 Outstanding Amount: Rs. 20,35,124.00 (Rupees Twenty Lakh Thirty-Five Thousand One Hundred Twenty-Four Only) plus future interest as per applicable rate and other charges thereon w.e.f. 15/01/2026
Guarantor: Mr. Zenoho Kulnu Branch: Kohima	Boundary: On or towards the North: Govt Quarter On or towards the East: Govt Quarter On or towards the West: Kuosielie G.B Plot On or towards the South: Plot of Lt Zevilie Angam	

Date : 08/05/2026
Place : Guwahati
SD/- Chief Manager & Authorised Officer
Guwahati Zone



TIR YIMYIM YIMOBILEM (EDITORIAL)

DIMAPUR THURSDAY, MAY (MONUPII) 14, 2026

Tsüngrem Metsübu Kümogo

Yashi Monüpii (May) 13 nü Thadou Baptist Association India (TBAI) nung lenirtem Churchandpur len United Baptist Convention sentong nung dener meyipa arudang, Manipur kübok Kangpokpi district nung ajungbena mejangjatetba telok kati injang yoka amakba lendong nung Reverend kati anir pastor ana tashi khasetba osang ya kangasa meimlaba taoksatsü aser tejashitsü osang ka lir. Manipur nung Meitie nung o Kuki nung na tsüngda aser Kuki nung o Naga nung na tsüngda aser ano Meitei nung o Naga nung na tsüngda yimten onük balala nung mapang mapang shia mangatettep adoka azü dena tokshia mepetmesü adokba osang asenoki angashir. Aji oda, 2023 küm May ita nungi tenzüka Meitei (Manipur) nung o Kuki nung na tsüngda Imphal lendon nung mangatettep lendong timtem adoka, Kuki nung o Imphal nung melitetsüsa akümba timtem tang tashi maneni lir. Ano, iba denji Manipur nung alir Naga nung o Kuki nung na tsüngda yim tashi maktepa lendong timtem adokba osang asenoki angashir. Iba ama tensa mejungi akümba agi, Manipur nung alirtem Meitei nungertem süli, Naga nungertem süli aser Kuki nungertem süli, shinga pei lima nung sadema mesenzüteter aser koba mapang nungang yim maker arua yim amaktsüar memetetba tensa tia ka nung, yimtsüng shia nung lanur teburtembo ajak mitkar kümer pei pei yimtsüng amang sangwa methitemi mita anüker. Ano, Manipur state nung aliba kin asem shia nung tebilemtsü talila kaji Meitei nungertema telong alirtem telok aika lir, kasaji Naga nungertem rongnunga telemsa lir aser ano Kuki nungertem rongnunga telemsa aika lir, anungji tangar den dang masü saka pei kin rongnunga telok o telok na tsüngda tsükchir kümer azü tokshia rarateper. Ibayongji, yashi Kangpokpi nung Kuki nung Tsüngrem tenzüker Reverend aser Pastortem gari ana nung ooya lia amakertemjia shirnoki amaker tang tashi mejangjateter. Aji oda, kari NSCN-IM nem tongloktsür, kari Zeliangrong United Front (ZUF) purtem tongloktsür, ano karibo Kuki Liberation Army nem tongloktsür aser ano karibo tangar teloktem nema tongloktsür ta koba teloki kechiba Tsüngrem tenzükerterem taküm tashi mapayui samatsütsü merangar mejangteti kümogo. Ibaji mapangi jangjatsütsü. Ajisüaka, asenok asoshi tebilemdangtsü aser shisabolutsü kaji, item Tsüngrem tenzükerterem taküm samatsürtemji Kuki aser Naga nungertem nungi asünungbo, parnok ajakji, tangar tamangba yimsü amangba kiralongrar telok masü saka Yisu dak amanger Khristan purtem dang lir, anungji Khristan purtemi pei amangba Tsüngrem tenzükerterem tepseter asütsü. Iba jagi Manipur lima nung dang masü saka asen lima nung dena Tsüngrem tenzükerterem taküma kümzüka malia ta sayur. Thadou Baptist Association India (TBAI) ta asüba telok ya akhidangbo Kuki Baptist Association ta liasü saka 1971 küm nungi TBAI ta tenüng melen aser Manipur Baptist Convention of Churches nung züngsem aküm, anungji Thaou ta asüba ya Kuki nungertem lir. TBAI nung yashi lendong ajurur Tsüngrem tenzükerterem ya, angazükba agi, Kuki aser Naga nungertem rongnung yimjung bushirtem liasü, anungji parnok taküm samatsütsü merangba telokji Naga nungertem o Kuki nungertem na tsüngda yimjung meyagludaktsüner telok asütsüa akok ta aikati temulung meleme bilemer. Iba ama nisung dang masü saka Tsüngrema metsübu inyakba osang angashia Manipur, Mizoram aser Nagaland Chief minister-temi kanga sashia aitsüogo. Manipur state nung tang alirtem Meitei, Naga aser Kuki nungertem ya teti kidangersa alitsü, kechiyong komaka anemtepdir anemtepaka, item kin asem rongnung shingaia shinga alijak nungi meshimeshiabo mesamadaktsütetsü, anungji kin asem ya adianu aser kidanger ama putepa alitsü asoshi TBAI nung Tsüngrem tenzükerterem yimjung asoshi inyakba ama, ano maneni Meitei, Naga aser Kuki nungertem Khristan purtemi inyaktsü nungdaker. Iba jagi dang asenok Tsüngrem chirtem akümstsü aser Manipur dang masü saka Nagaland-a dena tesünep nung alitsü.

OLEMSABANG

SHILUNOKTAK - TAOCHI AENLENMANG

~ O. Tongpang Jamir

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)

(Yashi adok nungi...)

Tapu trok

Tetsü oshi akangalongshiba

Taochibenla Shipurajem nung tesayur tajungtiba ka küma aobaji alima ajaki meteta adok. Yamaji temesüng oshi nung la kanga dang takutet tesayur ka saka ano lai tetsü oshi kodanga mamatok, kechiyong la sobaliba nung kanga akanga ametba aiür ka liasü. La class 1 nung asüdangyongi lai Ao subject kanga sapua agi aser ano Sunday School nung tesayuri Laishiba otsütem ashiba angazüka liasü. Yamaji HSLC nunga lai Ao subject nung tematiba jenjang ngutet.

Higher Secondary nungibo la azüngba mapang ano Ao subject magi- i liasü anungji lai Ao magitet. Saka kodang la College aser University ajangtet, ano Ph.D agiba mapang lai Ao Arangtet tatidang Ao Senden Literature Board (ASLB) ajanga agiba nung tatidang agütsütsü tenüng zülüok. Ao Arangtet Tatidang nungjia lai M.A tashi renemer kulikaket tajung nguteta rizünga ayu. College nung shisaluyimertem den sayudanga lai, "Temeim shisaluyimertem, oshi ka ajanga dang pei ayak jangjar, anungji koba kin südir sang pei tetsü oshi mamatoki apayua aser meima beshitsü aser jembitsü nenoki kodanga tamatok" ta sa ajungshi.

Tetsü oshi koda meimtsü aser angazüktsü ta asüba nung lai lokti aika nung jembia senzü aser ajungshi. Ano lai English aser Ao nung Tsüngrem O nung tera ayangba den pei sobaliba ayak meteta tetsü oshi koda wazüka ayutsü ta asüba nung ajemdaker onük balala nung kakat aika zülü. Yamaji mapang shia la ya arogo aser lokti balala aika asoshi sentong balala nung Tsüngrem O den tetsü oshi shisalen tuyur (resource person) tajungtiba rongnung ka aküm.

Jila nung alir lanurtem aikati pei tetsü oshi mejembiba aser memeimba ajiteta jila Ao Arogo kati "Tetsü Oshi Yayim Aser Ayak" nung ajemdaker shisatokden ka ayong aser yangji Dr. Taochibenla shisalen tuyur asütsü jaok. Item shisalen ajanga lai lanurtem ayongzük :

- Tetsü oshi yayim ta kodang südir, ibai pei tetsü oshi ka timtesüi ayuba/shitakbalen jembiba/payimi aniba lir. Kodang nisung shiai iba oshiji meima aser meteta jembiteter aji pei ayak shitak wazüka ayur asütsü.

- Tanü asen lima lanur aikati, "Moito Ao Kota Koboli Aro Likiboli Alchi Laki Hoo..." ta nematangtanga jembiba angur. Lanurtem, asenokbo iba nungji medenli.

- Lipok 11:1-9, alima ajak nung oshi ka dang liasü ta asüba otsü ka angur. Saka meimchirisa atongerji Tsüngrem tenüng uluja akhümstsübuttsü melena mezümeküma bilema inyaksangshiba ajanga Kibubai iba anogo nungi tenzüka oshi balala kumdaktsüba asenoki meteta lir.

- Summer Institute of Linguistics (SIL) International ajanga ashiba agi, alima nung oshi ajak agi 7,100 shi tamshidak aser tejembidak lir. Item rongnungji asen Ao oshi ya-a dena lir. Iba züngyaji teti kasa malir saka mapangshia khenkhen tajemba mesüra teimba ta atur (fluctuate). Parnoki language database ka Ethnologue ta sür adoker, koba dang Ao agi "Oshisep" ta ajatsü akok.

- Shisarokbushirtemi ashiba agi tanü tashi nung oshi 600 nungi 700 shi khenyongi mali samaogo. Tongtibangsa ibaji alimatesentaktep (Globalization) nung talitapongka aroka aoba ajanga lir. Ano tang oshi samatsü lendong nung alirtemji (danger of extinction) 3,000 shi lir ta ashir. Ashiba agi hapta ana nung oshi ka samadar. Anungji iba küm noklangzüng ya tatem tashi nungbo alima nung oshi tesadang kashi samatsü. Aji asünung oshi kaji kanga meraküta apayua wazüka ayutsü tim. Asen Ao oshia mesamadaktsünüra, arungma asenoki teti meima wazüka ayutsü merangdi.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Israel-i Khristan putir ka dang West Bank toktsür aotsü tuyu



Louis Salman

May 13, 2026: Israel-i permit renew sütsüsü memelungba agi West Bank kübok Bethlehem yimti nung aliba Arogo nung inyaker putir kati Bethlehem toktsür aotsüsa aküm.

Jordan nung putir Louis Salman ya Latin Patriarchate of Jerusalem nungi putir lir. Hombar tashi nungbo West Bank toktsür oadokang, ta pa nem tetuyuba agütsü.

Beit Sahour jila nung tatema pai tepila sentong agia liasü. Iba jila ya Yisu Khrista asotsü

osang kotak tenyartemi sannükertem nem sangoktsüba tesem lir.

Amongnü (May 10, 2026) tatembangbuba tepila sentong nungji nisung 150 shi aden.

Youth in Palestine atema chaplain ka ama putir Louis-i iba region nung aliba lanurtem kanga junga tenzüka aruogo.

Lanurtem rongnung putir Louis ya kanga nungtugu akümba agi Israel ketdangsertemi pa indang visa thinentsü, ta Arogo nung

lenirtemi metetdaksü.

2022 küm May ita nung Khristan Palestinian-American journalist, Shireen Abu Akleh indang asüpila sentong pai ketdangsa agia liasü aser pa leniba nung yimdong süa jaja.

Israel ketdangsertemi, Louis-i ibaji yimtenren dak sendakba nung tangartem ajungmesotsü atema inyakba lir ta shia pa aija liasü.

Al Jazeera reporter, Abu ya Jenin refugee camp nung lia Israeli Defence Force (IDF) sepaitemi khaset.

Mezüngbo Israel sepaitemi, la ya Palestine nungertemi khaset ta tai tonglokja liasü, saka testasabo Israel sepaitemi injang yokdang aibelena la khaset, ta ashi.

Israel nung Khristantem anema inyakba tatalokba kanga bulua akümer aser taküm Temeshi hopta aser Easter mapang nunga Israel ketdangsertemi Khristantem tekülem anema tenokdangba aika benoka liasü.

Iba dak alia Israel sepaitemi Lebanon nunga Khristan yimstüngtem maneni amaker.

ANOGO ABEN TSÜNGREM DEN


Tetushi mapa

"Kibubai asenok bilemtetter aser asenok moatsütsü"(T. Ken 115:12).

Iba tepela tenangzükba nung temoatsü lenmang aser teimla petinu lir! Tenüng asangtsü memetetba ajanga takümüji takong kümdaktsür. Asenoki shibai moatsür pa nem tenüngsang peria magütsüba agi asenok teimla takong kümdaktsür. Tenüngsang agütsüba nema-a kümdaktsüba ajanga asen teyongyaba mepet agi subangdaktsür. Asen teyongyaba mejangjara tamang nung mashileni aor. Yashi taochi nung jajaba ajanga asenok teimla kümdaktsüba dak alema tanga kecha asen teimla kümdaktsütsü makok. Tsüngrem temoatsü asen anogoshia agir saka asen temulungjang tezülen tetsübuji yutsür. Tsüngrem temoatsütem bilemteta aliba ajanga anu talemi mepet sushidaktsüba ama sen temulungjang nung aliba tetsübu ajak süshia odaktsür. Tsüngremi ajungba bilemtetba ajanga temokong anogoji teti talem anogo kümdaktsür.

Kechiba tetushiji nungdaker? Tenüngsang medeni tanüngba taochiji akatsü makok. Tetushi medeni takümüji tangu mali. Tetushiji ajanga kotaker telok dena aliba tesangwa ngudaktsür aser teimla tanela kadaktsür.

Belarus Festival of Hope nung Rev. Franklin Graham-i jembitsü



Rev. Franklin Graham

May 13, 2026: Hokolbar aonung (May 15) nungi tenzüka Chizhovka Arena, Minsk nung aonung asem tashi evangelistic sentong tuluka ayongzükba agitsü, aser ibaji Belarus puti otsü nung evangelistic sentong tuluba asütsü, ta sentong ayongzükertemi metetdaksü.

May 15 nungi May 17 tashi Festival of Hope agitsü. Iba sentong ya Billy Graham Evangelistic Association (BGEA)-i ayongzükba.

May 16-17 anogotem nung sayutsüngir Rev. Franklin Graham-i sayutsüngitsü. Item sentong nung züngsem 1,300

aliba choir-i ken atenba den külemi Belarus, Russia aser United States nungi kentener telok aikati shilem agitsü.

BGEA den yariteper evangelical lenir, Leonid Mikhovich-i, "Yangi item ama sentong kodanga magidang. 1990s mapang nunga item ama sentong tulu magidangi liasü," ta metetdaksü.

United Church of Christians of Evangelical Faith, Republic of Belarus aser Union of Evangelical Christian

Baptists of Republic of Belarus na densema Belarusian evangelical telok aikati iba sentong takok

angutsü atema yaritepar.

Mikhovich ya Baptist Union nung general secretary lir.

Mikhovich-i, outreach sentong aika nung Belarus nung aliba evangelical Arogo temi amalitepa aruogo saka linük level nung Arogo temi amalitepa inyakba yabo tang mezüng lir, ta metetdaksü.

Mikhovich-isa, iba ama sentong ayongzükba ajanga Belarus nung evangelical Arogo tilatemia shilem agiteter, ta ashi.

Belarus nung nütsüng shilem 2 shi dang Khristantem lir.

Mikhovich-i, iba sentong ya alizüng ka tongtetba asütsü ta ashi.

Ajisüaka yimsü temeden atema inyakertem karibo, sorkar ketdangsertemi item ama sentong tulu ayongzükba agitsü atema temelaba agütsüyonga Khristantem anema maneni tenokdangba balala benoktsü, ta ashi.

US Commission on International Religious Freedom (USCIRF) vice-chair, Asif Mahmood-i, "Festival of Hope sentong agitsü atema temelaba agütsür ketdangsertemi evangelical nem temeden tuluba magütsütsüa akok. Yimsü temeden atema Belarus-i temeden kangabo magütsür saka taliba dang azüoker," ta

metetdaksü.

Belarus ozüng kübok yimsü teloktem bendangshidanga züngshir; Orthodox Arogo nem temeden tuluba agütsür, iba sülen Catholics, Yihuda nungertem, Muslim nungertem aser evangelical Lutherans lir, ta USCIRF-i metetdaksü.

Tanüngba Protestant teloktem- Baptists aser Pentecostal Khristantem nembo temeden kangabo magütsür, tangar Khristan yimsü dangi meyipdaksütsü memelar aser moapu nung sentong agitsü memelar.

2020 aser 2021 kümtem nung Belarus nung nüburtemi longkak aitba sülen election nung Tir, Alexander Lukashenka-i maneni takok angu, aser iba mapang nungjagi sorkari register süa aliba yimsü teloktem kanga azüoker.

2023 küm Belarus sorkari Pentecost Arogo- New Life Church bendokja liasü. Iba Arogo nungji züngsem 1,500 shi lir. Iba Arogo nung pastor, Vyacheslav Goncharenko-i 2020 küm agiba election anema jembiba aser Ukraine atema sarasademtsüba sentongtem nung shilem agiba sülen sorkari par Arogo Tenla ki bendoktsü.

Ketdangsertemisa longkak aitba nung shilem agir pastor tem aika apu.

Ajisüaka Mikhovich-i,

tesüiba küm 20 tsüngda evangelical Arogo temi shisaliok aser Arogo tasen tenzüksüba nung shilem tulu agiogo, ta ashi.

Paisa, "Onoki theological shisaliok agütsüteter. Onoki tanurtem dang sayuteter. Onoki tekülem sentong agiteter. Onoki ajak inyakteter," ta metetdaksü.

Mikhovich-i, "Franklin Graham-i osangtajung sayutsüngiba ajanga nisung aika, talisa lanurtem aikati Khrista agizüka baptitsü, ta onoki Tsüngrem dak amanger," ta metetdaksü.

1990s den medemdangra tangbo Belarus nung evangelical Arogo anasü agi teimba kümogo aser evangelical Arogo o sorkar na tsüngda tesendaktep tajungba kümogo.

Chizhovka Arena nung ayongzükba festival mezüng aonung Belarus evangelical lenirtemi sayutsüngitsü aser Honibar o Amongnü aonung na Franklin Graham-i sayutsüngitsü. Graham-i English oshi nung sayutsüngitsü aser sayutsüngir Viktor Hamm-i par oshi nung meyipzüktsütsü.

Franklin Graham tebu, nungtugu sayutsüngir Billy Graham-i tamalen Moscow (Russia), Tallinn (Estonia) aser Kiev (Ukraine) yimitem nung evangelistic sentongtem agia liasü.

AO OSHI ANGAZÜKDAK:

TANÜ ANGAZÜKTSÜBA OJANG



Yari

(v) mapa nung asem, nungit (help)

* Ni kütsü shirangba mapang yari.

Yartsüngsang

(n) asem ola den peta jokshishia tsüngsangba (Folk dance)

* Moatsü mapang teburtemi yartsüngsang tajung ka sayu.

OLONG PAITEP # 7503

	1		2			3		4		5
6								7		
					8		9			
			10							
11										
				12						
13		14		15						16
17										18

TIPIEN	LANGTSÜNGLEN
1. Inyaker ajangtelba - (3)	1. Meshidak - (3)
3. Bangsemo adokdak - (5)	2. Tanaben soshir - (7)
6. Shitak mesüi inyak - (7)	3. Iba anogo - (4)
7. Ya mimong nung angur - (3)	4. Meshi - (3)
9. Reprangzük - (4)	5. Yagi mi tsükloker - (9)
10. Tasola - (5)	6. Shi tapu ka - (9)
11. S ____ - (4)	8. Yagi ayimer saka ozü masü - (3)
13. Yagi ajak ashioktsür - (3)	9. Ajokba shiruru ka - (7)
15. Ki aokba oset - (7)	12. Inyaktet - (4)
17. Ak shi nung inokba tasen - (5)	14. ____ hi - (3)
18. Ishika - (3)	16. Akümlü nungi pilar - (3)

OLONG PAITEP # 7502 TELANGZÜBA

TIPIEN :	LANGTSÜNGLEN :
1. Telok, 4. Aluru, 6. Ozüng, 8. Emk,	1. Tenükjang, 2. Luden, 3. Kiochtsü,
9. Kin, 10. Teti, 12. Süir, 13. Jen,	5. Lenti, 7. Tajangzük, 11. teronem
14. Ola, 16. Talak, 17. Mazük.	12. Sempa, 13. Jahaz.

NAI-A YA METETTER



Bangalore Development Authority-i June 5 World Environment Day nung 15 lakh saplings tema Guinness Record ka yanglutsü nükjidong lir. Iba mapa ya anogo 10 tashi agitsü akok saka shilem tongtibaji June 5, 2026 nü inyaksü ta DH, BDA Chairman NA Haris-i metetdaksüogo. Iba mapa nung volunteers 50,000 aser 80,000 tsüngda nungdaksü aser iba atema schools, colleges, NGOs aser volunteers jaokogo.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Hnamte-i National Florence Nightingale nurses award angu



Aizawl, May 13, 2026 Health and Wellness Centre ka nung inyaker. Lai grassroots healthcare nung shilem tajung agiba aser frontline health worker ka ama inyakba ajiteta iba sempet agütsüogo.

New Delhi nung May 12 nü International Nurses Day tenüng nung sentong ka agidang President Droupadi Murmu-i Lalenthangi Hnamte nem sempet agütsü.

Lalenthangi dang Maeni ta ajar aser la Lunglei district nung

Health and Wellness Centre ka nung inyaker. Lai grassroots healthcare nung shilem tajung agiba aser frontline health worker ka ama inyakba ajiteta iba sempet agütsüogo.

National Florence Nightingale Nurses Award ya linük nung nursing professionals atema tematiba sempet lir. Iba sempet nung medal ka, certificate of honour ka aser Rs 1 lakh senpet dena lir.

Kümshia public health services nung bendanga agüja inyakba nurses aser healthcare workers nem iba sempet agütsür. Talisa meta talang pilar alidak aser underserved areas nung inyakertem nem iba sempet agütsü.

Taküm iba sempet asoshi linük ajungalen nungi nisung 15 shimtetba rongnung Hnamte densema lir.

"Iba ya asen state atema konang tulu ka lir" ta Mizoram Governor Vijay Kumar Singh-i Hnamte nem tenüngsang agütsüogo.

Hnamte-i iba sempet agizükba ajanga healthcare workers ajungmesotsü ta Governor Singh-isa ashi.

Hnamte-i Lunglei district nung public healthcare services nung shilem agia arur. Iba district nung Health and Wellness Centres ajanga nübertem nem primary medical care, maternal health support aser preventive healthcare agütsüba nung tongti shilem agir.

KNO & ZRO-i Manipur CM sentong nung madentsü

Imphal, May 13, 2026 (Agencies): Manipur Chief Minister Y. Khemchand Singh-i May 15 nü Churachandpur semdangba nung shilem magitsü ta Kuki National Organisation (KNO) aser Zomi Re-unification Organisation (ZRO) ajanga metetdaksüogo.

May 11, 2026 nü KNO aser ZRO külem senden ka amandang iba lemtet agiogo.

WhatsApp channels, WhatsApp groups aser Facebook pages dena social media sabangtem nung kin o kin tsüngda meputep adoktsüsa osangtem

prokshiba mita reprangtsü atema telok anati Joint Monitoring Cell (JMC) ka tentetsü telemtetba agi.

Iba cell nung KNO aser ZRO nungi Information and Public Relations Department tem adentsü aser telok anaprong nungi secretary tem külemi JMC ketdangtsü.

May 3, 2023 sülen common political goal renemba memelenshir aser tarutsü nung lemtet ka magi tashi Union Territory with Legislature takhangba nungi masetshir ta KNO aser ZRO-i metetdaksüogo.

"Kuki-Zo" nungja amshiba

atema ZRO lennirtemi ashishiteper aser Zomi nungeri magizükter ta ashir. Iba atema KNO cabinet-i mezüng lennirtem den olemteptsü aser iba sülen ZRO den senden ka mena jembitsü ta telemtetba agiogo.

Zomi nungeri common political movement sasep nung kati ka akhümtsübutepa "Kuki-Zomi" nungja amshi junger ta Zomi lennirtemi tebilemba ka shidang.

KNO aser ZRO-isa political dialogue nung yaritepa aotsü atema Central Working Committee ka tentet junger ta jembitep.

Meghalaya nung arishi küm 15 ser temapur tesadang kati moko achir

Shillong, May 13, 2026 (Agencies): Meghalaya nung arishi küm 15 ser temapur tesadang kati tobacco amshir aser kümshia tobacco dak sendakba tashidak balala ajanga nisung 8,000 shi asür ta ketdangtsürtemi metetdaksüogo.

World No Tobacco Day (WNTD) 2026 campaign tenziükba sentong nung National Tobacco Control Programme indang State

Nodal Officer Dr Nabaneeta D Mawrie-i iba osang metetdaks.

Iba ya public health challenge tongtipang ka lir aser rongdak mapa inyaksü nungdaker ta Mawrie-i ashi.

Meghalaya nütsüng yongsük teimba kati moko achir aser iba yimya ya lanuputu dak kongshir ta lai ashi.

"Moko ya yimya ka dang masü saka asen lanur aser nübertem

addict kümdaksütsü jungjunga yangluba sang ka lir" ta laisa ashi.

"Asenoki state nung moko achiba ajema kümdaksütsü asoshi awareness campaigns, preventive measures aser coordinated interventions tuluba inyaksü nungdaker. Asenoki tainlonglong aser lanurtem tobacco exposure aser addiction nungi kümzüka ayutsüla" ta Mawrie-isa metetdaksü.

**GOVERNMENT OF NAGALAND
STATE COUNCIL OF EDUCATIONAL RESEARCH & TRAINING
NAGALAND: KOHIMA**

NO.SCERT/SBTE/PSTE/Notice/6/2010-11/

Dated Kohima the May 2026.

ADVERTISEMENT

Admission for Pre-service candidate to the 2-Year Diploma in Elementary Education (D.El.Ed) Application is invited from intending candidates for undergoing the 2 -Year Diploma in Elementary Education (D.El.Ed) under SCERTNagaland, Kohima for the academic session 2026-2028.

Eligibility Criteria:-

- Candidates should have qualified 12th grade from a recognized Board/Council/University by obtaining atleast 50 % mark in aggregate, 5 % relaxable for SC/ST.
- The minimum age limit is 18 years and maximum age is 28 years, relaxable upto 5 years for SC/ST only.
- The selection procedure will be based strictly on Merit in the interview and subject to availability of seats in each Institute.
- Candidate can apply in any one of the following Institutes.

1. DIET-Chiechama	2. DIET-Dimapur	3. DIET-Mokokchung	4. DIET- Mon
5. DIET-Pfutsero	6. DIET-Tuensang	7. DIET-Wokha	8. DIET-Zunheboto
9. St.Paul Institute of Teacher Education-Phesama	10. Salt Christian College of Teacher Education-Dimapur		
- Admission forms can be downloaded from SCERT website (scert.nagaland.gov.in) w.e.f 20th May 2026.
- The form, along with necessary documents should be submitted in the respective Institutes on or before 22nd June 2026.
- Date of Oral Interview: 29th June & 30th June 2026.
- Declaration of Result: 2nd July 2026.
- Date of Admission: 6th July -10th July 2026.
- Classes starts on 27th July 2026.

(KERÜUPFEÜ RÜPREO)
Director & Secretary
SCERT:SBTE
Nagaland, Kohima.

Israel-i southern Lebanon amakdang nisung 13 tepset

Beirut, Monupii/May 13 (Agencies): Israel-i tayimtsü amshia southern Lebanon amakba nung nisung 13 asü, kong ceasefire liaka Israel aser Lebanon nung telungpur Hezbollah telok tsüngta rara manener.

Yasüng Kfar Dounine nung ki ka amakba nung nisung trok asü aser tenet yiru, ta Lebanon sorkar meyong National News Agency (NNA) ajanga ashi.

Mongulbar nikongdang Israel-i Nabatieh nung amakba mapang Lebanese Civil Defense emergency services nungi paramedics ana tepset aser ka yiru, kong parnok ya aji matalokdang amakba ka nung nisung ka tepseter alidang rescue mission inyaka liasü ta Lebanon indang health ministry ajanga ashi.

Israel mitkari item osang asadangtar ta shiogo.

Lebanon Tir Joseph Aoun-i tejashi lemsatsep aser Nabatieh nung Civil Defence züngsem ana tepsetba asoshi sasaba lemsatsep - tena ya Hussein Jaber aser Ahmad Noura ta jangjaogo - aser Israel-i maneni tashiyim amshiba ajanga süngjema alitsü merangba nung timtem agütsür ta ashi.

Israel sepaitemi paramedics

dak asaa tenük yoker amak ta health ministry-i aitsür.

"Iba ama tenük yoker amakba ya ajanga tsükchir Israel-i international humanitarian law nung aibelenba aser international norms ajunga züngshia maliba kuli tejangjaba sayur," ta ashi.

Iba rara mapang Lebanon nung emergency medical services aser healthcare workers 108 tepsetogo aser Israel-i ambulances aser medical facilities nung 140 ben dak tali amakba record lir, ta ministry ajanga Hombarnü ashi.

Mongulbarnü Tayr Debba tesem nung lenmang ka nung Syria nung ka aser pa kinungsü motorcycle nung mener aodang Israel indang drone kati amakba nung kinungsü yiru aser kinungbo asü, ta NNA ajanga ashi.

Israel mitkari temulung melemi alir ka dak amak, shibai ozü aircraft tsütsüi surface-to-air missile khaloktsütsü merangba nung tamakok ajurur jena liasü ta ashir.

Hezbollah züngsem temi southern Lebanon nung aliba Israel sepaitem tsütsü tapoktsü keta aliba drones yok saka asü-amaba mali, ta parnokisa ashi.

Ano Mongulbarnü Jabshit

nung amakdang nisung asem asü, ta NNA-i ashir.

Kasa mapang Hezbollah-i southern Lebanon nung Naqoura, Bayada aser Houla tesemtem nung Israel sepaitem dak drones agi amak aser northern Israel nung Kibbutz Manara nunga sepai ka amak ta ashi.

Israel mitkari southern Lebanon nung amakba tang tali kumogo.

Parnoki Hezbollah züngsem aser par ki o jen amaker ta ashir aser Iran-i yariba shia Muslim telok yagi ceasefire nung aibelener ta ashi, koba US tetsüngtai ia Israel aser Lebanon sorkar tsüngta April ita züngzüktepa liasü

Hezbollah-i meyipar northern Israel nung aliba nüburttem aser southern Lebanon nung shilem kar agir aliba Israel sepaitem dak rocket aser drone amshia amaker.

Israel aser Lebanon ketdangsürtem ano Washington nung Brehostibarnü ajurutepa rara tembangtsü asoshi lenmang bushitsü imlar.

March 2 nung iba rara tenzüker Lebanon nung nisung 2,869 tepsetogo aser kasa mapang Israel sepai 18 aser civilian pezü tepsetogo.

Russia-i intercontinental ballistic missile ka tendangogo

Moscow, Monupii/May 13 (Agencies): Russia-i intercontinental ballistic missile ka tendangogo, aser tir Vladimir Putin-i nuclear-capable Sarmat missile ya alima nung missile tashitaitiba ta shiogo.

State television-i, Russia indang strategic missile forces commander Sergei Karakayev-i, Putin dang iba missile Mongolbarnü takok ngua tendangba indang metetdaksüba sayuogo.

Putin-i ashiba agi, Sarmat missile ya taküm küm tatemlen combat service-i aitsü.

"Iba ya alima nung missile tashitaitiba lir," ta pai ashiba den, iba indang warhead ya aliölen aliba linüktem indang missile dang nungi pezüben agi tesashitiba lir, ta shisem.

Putin-isa, Sarmat ya km 35,000 tashi nung khaloktsütetsü aser iba yagi tang aliba aser tarutsü nung yanglutsü aliba anti-missile defence system ajak ateta itettsü, ta ashi.

Sarmat ya 2011 küm nungi yanglu tenzüker aser Mongolbarnü takok ngua metendang tsüngda khen dang takok ngua tendanger liasü, aser osang ajanga ashiba agi 2024 tendangba mapang kanga mejungi poka liasü.

Aniölen aliba linüktemi iba missile dang ya "Satan II" ta ajar aser iba yagi Soviet mapang yangluba Voyevoda missile 40 shi melentsü. Putin-i Mongolbarnü ashiba agi, Sarmat ya Voyevoda ama tashi tait saka iba dang nungi temezüngba.

United States aser Russia na nuclear arsenals aziöka aruba inaykyim chirepba atema süoki ia bilemba mapang ka nung tang iba missile tendangogo.

Russia aser US na tsüngda strategic warhead yangluba aser delivery system aziöksü atema tatembangbuba tenangzüktepa START February ita tembangogo, aser iba ajanga alima nung nuclear power tulutiba ana ya aso ka tesadang tsüngda tang mezüngbuba formal taziökba ka maka lir.

Moscow aser Washington nati tenangzüktepa mapang tembangba sülen temaba jenjang nung military sensaksem agitsü mulungtepogo, saka iba melena tenangzüktepa ka yanglutsü asoshi linük ana tsüngda kecha temaitsü mali.

New START indang provision tem sülen tashi anga manidakba atema linük anapronglai kati ka dang tai tongloksütepa arudar.

New START tenangzüktepa ya metembang tsüngda ken o balala asüngdangba Trump-i melangzüi arudar.

Putin, shiba 2000 küm nungi linük yimsüsü arudar, pai Soviet mapang yangluba Russia indang nuclear triad tem tajungba küma yanglushiba achaayanga arudar. Russia-i land-based intercontinental ballistic missile tasen aika deploy süogo aser iba den nuclear submarines tasen ka sayaogo aser nuclear-capable bomber

tem modernize süa arudar.

Russia-i, nuclear-capable Oreshnik intermediate-range ballistic missile tasen ka commision süogo aser Ukraine amakba mapang iba indang conventionally-armed version bo anaben tashi amshiogo. Oreshnik ya 5,000km (3,100 miles) tashi yima oteter aser iba tetezü iba missile ya Europe nung tesem mashi ka nung khaloktsütettsü.

Putin-isa, miniature atomic reactors agi tashi agütsüba nuclear-armed Poseidon underwater drone aser Burevestnik cruise missile teyangluzüker dang lir ta metetdaksüogo.

Putin-i, item hadir tasentem ya US missile shield atema Russia-i telanzüba agütsüba nung shilem ka lir ta shiogo. US missile shield ya Cold War mapang US-Soviet Union pact koba ajanga missile defence aziöka liasü, iba nungi 2001 küm atsünginba sülen US-i yangluba lir.

Russia military atema sentong yanglurtemi, US missile shield daka temulung lema parnokii Russia tama amaktsü asoshi atidangtsü akok, koba ajanga Moscow indang nuclear arsenal timba raksatsütsü aser iba sülen Russia indang tanungba missile ishika ya ayong ayonga khadangtettsü, ta bilemer.

"Tashi liromedema toktsütsü atema alima melenshia aoba mapang onok indang strategic security asadangshitsüsa kümogo," ta Putin-i ashi.

KIBONG KÜMER KÜM 50 AJUNGER

May 14, 1976 - May 14, 2026



Mr. Moa Imsong & Mrs. T. Angangla Longchar (Longjang)

Tsürabur kibong kümer tanü taküm lia küm 50 abensaba anogo ajurunung teyanglur Tsüngrem tenüing asanger. Temeim Oba-Oja, nena tamang sarasadem, rongsen, shisatsü den taküm nung tia balala den rarea onok jenjang tajung kümdaktsüogo, kanga pelar. Tsüngremi nena maneni taküm tajung yujang ta sarasademtsür, aser nena aküm nung onok chirnur aser semchi-semnurtem temoatsü nung alitsü.

~ Temeim Chirnur & Semchirtem.

MOLUNGNEN O

MEDANGCHIBA (Molungyimsen)



ASO: 08.03.1933

ASÜ: 8.05.2026

Onoki teti meima aliba Obala asüandang shirisa sarasadem, molungso tenla aser aria bilema arua asükhu mangyim jashi mapang onok anisüngzük agütsüogo onoki kanga pelar.

~ Temeim chirnur, semchir aser kinungertem.

Iran rara nung China teyari menüngdaker: Trump

Washington, Monupii/May 13 (Agencies): US Tir

Donald Trump Bodhbarnü China-i Tir Xi Jinping den senden amentsü ayamesogo aser Iran den raraba tembangtsü aser Tehran-i Strait of Hormuz nung soita aliba salatsü atema Beijing teyari menüngdaker ta ashi.

Washington nungi mapusodang, iba mangatettep bentettsü asoshi China-i inyaktettsü imlaba Trump-i mesayu, kong linük anaprongi iba tzü lenmang mokdanga lir, kong aliba nung totzü shilem 20 shi abener.

"Iran den asenoki teyari kecha menüngdaker ama ni bilemer. Asenoki ka külen mesüra külen nungi akoktsü, yimjung len nungi mesüra lenmang tanga nungi," ta pai osangbenertem dang ashi.

Ceasefire tenzüker ita ka dak tali arur, saka US aser Iran nati rara tembangtsü akhangba nung tepila lir.

Washington-i Tehran dang nuclear sentong agentsü aser strait nung soita aliba salatsü ashir, aser külen Iran-i US dang rara nung teraksa bener arutsüba melen sen meshir, US-i mokdanga aliba tembangtsü aser Lebanon densema tesem ajungalen raraba anentsü ashir.

Trump-i item takhangbaji 'jana' lir ta ashir.

Kasa mapang Iran ya Strait of Hormuz kanga junga amokbanga lir ama ajiteter, aser parnokii region nungi Iraq aser Pakistan leni totzü aser liquefied natural gas bener yoktsü tezüngzüktep agia aliba rakdanger.

Bodhbarnü China nunger supertanker ka nung Iraq indang crude (totzü tazü) barrels 2 million bener strait ajanga aotsü meranga liasü. Parnoki takok ngua ajangtetra, ibai US aser Israel nati February 28 nü Iran dak amak tenzüker iba channel ajanga Chinese oil tanker asem buba ajanga aor alitsü.

Tanga linüktema iba mesük Iran den jembishinü akar, kechiaser fertiliser, petrochemicals aser danga tongtipang osettem iba tzü lenmang ajanga abener aser aji Tehran-i amokbanga lir.

Iba region ajanga rong senzüba nung linük katia sen memeshitsü ta taoba ita US aser China ketdangsür temi mulungtepogo, ta Trump administration-i Mongulbarnü ashi.

China ya Iran nunger totzü aika alirtem rongnung ka lir, aser Tehran den tesendaktep tajung lir.

Wawrinka, Monfils na nem Roland Garros atema wild card agütsü



Gael Monfils & Stan Wawrinka

Monupii/May 13, 2026 (Agencies): Stan Wawrinka aser Gael Monfils na taküm tatabangbuba French Open nung asayatsü jangjaogo.

Roland Garros-i Hombarnü sangdong ka ajanga asayar anaprongla nem 2026 French Open tebur kija asaya main draw atema wildcards agütsüba jangjatsüogo.

Grand Slam asem koker aliba Wawrinka taküm agi 21benbuba Roland Garros nung asayatsü lir. Arishi küm 41 tain Switzerland nung asayar ya ATPTour tatabangbuba nung asayadar. Grand Slam asem tashi koka career nung takok aika anguba sülen pa tang asaya aliba season tembangba sülen asaya nungi anisüngzük ta shiogo.

Kasa mapang nung France

nungertemi kanga saklokba asayar Monfils-a kidang tatabangbuba Grand Slam asayatsü lir.

Arishi küm 39 tain asayar yagi 2026 ya pa asoshi tatabangbuba season asütsü ta shiogo, anungji iba ya pa asoshi tatabangbuba Roland Garros asütsü. Osang ajanga ashiba agi asayamung ayongertemi ajak dang temeimtiba France nung tennis asayar atema ya sentong ka renemsüdar.

Monfils Roland Garros nung mezüngbuba 2005 küm asaya aser iba sülen pa iba asayamung nung khen dang masaya. Pai iba asayamung nung 2008 küm tajungtiba asayaogo, ajisiüaka pa semifinal nung set pezü asayaba sülen Federer-i tsükdakja liasü.

Teburtem kija asaya atema asayar ti nem wildcard agütsüogo. Asayatem ya timba France nungertem lir.

Roland Garros atema wildcard agütsüba tebur asayatem:

Nishesh Basavereddy, Titouan Droguet, Hugo Gaston, Arthur Gea, Moise Kouame, Gael Monfils, Adam Walton, Stan Wawrinka.

Tetsürtem rongnung iba asayamung atemabo Venus Williams nem wildcard magütsü, shiba nem Australian Open, Miami Open, aser Madrid Open atema wildcard agüja liasü.

2026 Roland Garros main draw ya May 25 nü tenzüksü, aser qualifying ya hopta ka jelia tenzüksü. Tetsür aser tebur final June 6 aser 7 nü asayatsü.

Pakistan & Bangladesh den asayamung atema Pat, Starc, Josh nung meshim

Monupii/May 13, 2026 (Agencies): Pakistan aser Bangladesh na den taruba white-ball asayamung atema Australia-i fast bowler Pat Cummins, Mitchell Starc aser Josh Hazlewood nung anisüngzükdaksütsü telemteba agiogo. Parnok melena taruba küm T20 World Cup atema renemshiba ka ama asayar shimertemi lanur asayatem shimogo.

Asayamung ajak nung Mitchell Marsh Australia captain asütsü. Mezüngbuba asayamung ya May 30 nü nungi tenzüka Pakistan den ODI asem asayatsü. Lanur asayar Ollie Peake, shiba lenisüba nung Australia Under-19 team World Cup asayaogo, pa den linük team nungi khen danga masaya aliba all-rounder Liam Scott na tang mezüngbuba team nung züngoksemogo. Riley Meredith aser Billy Stanlake nata squad-i meyipa aruogo.

Asayar tejen Glenn Maxwell, Bangladesh den T20 asaya atema squad nung mezüngoksem aser batter Joel Davies tang mezüngbuba

shimogo. Cummins, Starc aser Hazlewood nung ya tali m a s a y a d a k t s ü i anisüngzükdaksütsü atema iba jenjang agiogo.

Bowler asemprongla ya tawang yirur aliba nungi meyipa arur IPL nung asayadar, aser Bangladesh den taküm küm kidang Test ana asayatsü aliba dak rangloker renemdar.

Australia nung asayatem aika Pakistan den ODI asayamung nung shilem magitetsü, akok kechiyong parnok IPL nung asayadar. IPL final ya May 31 nü asayatsü, koba asayamung den mapang kasa nung asütsü.

Pakistan den asayamung atema Australia ODI squad: Mitchell Marsh (c), Alex Carey, Nathan Ellis, Cameron Green, Josh Inglis, Matthew Kuhnemann, Marnus Labuschagne, Riley Meredith, Oliver Peake, Matthew Renshaw, Tanveer Sangha, Liam Scott, Matt Short, Billy Stanlake, Adam Zampa.

Bangladesh den ODI atema Australia squad: Mitchell Marsh

(c), Xavier Bartlett, Alex Carey, Cooper Connolly, Ben Dwarshuis, Nathan Ellis, Cameron Green, Travis Head, Josh Inglis, Matthew Kuhnemann, Marnus Labuschagne, Matthew Renshaw, Tanveer Sangha, Liam Scott, Adam Zampa.

Bangladesh den T20I atema Australia squad: Mitchell Marsh (c), Xavier Bartlett, Cooper Connolly, Tim David, Joel Davies, Nathan Ellis, Cameron Green, Aaron Hardie, Travis Head, Josh Inglis, Spencer Johnson, Matthew Kuhnemann, Riley Meredith, Josh Philippe, Matthew Renshaw, Adam Zampa.

Pakistan series schedule:
First ODI: May 30, Rawalpindi
Second ODI: June 2, Lahore
Third ODI: June 4, Lahore
Bangladesh series schedule:
First ODI: June 9, Dhaka
Second ODI: June 11, Dhaka
Third ODI: June 14, Dhaka
First T20I: June 17, Chattogram
Second T20I: June 19, Chattogram
Third T20I: June 21, Chattogram.

Zoravar India indang Asiad Squad nung mali

Monupii/May 13, 2026 (Agencies): Asia nung No. 1 aser world No. 6 trap shooter, Zoravar Singh Sandhu, taküm Asian Games atema Indian shotgun contingent nung mali. Pa ya India nung rongnung trap shooter tem rongnung temaba jenjang nung lir aser taoba küm World Championships nunga bronze medal ka ngur liaka pa squad shimtsü atema asayatem shimba nung züngoka mali.

National Championships aser domestic selection trials agiba mapang Zoravar-i junga masayatet. World Championships aser World Cup Finals atema renema mapang international asayamung balala nung mazüngi asayaba tialong nung pa iba asayamung ana nung ya-a asayatsüsa aküm.

Pa ita ka tejakdang world No. 4 liasü saka National trials nung junga masayatetba sülen pa Asian Games squad nung mezüngoksem.

Zoravar-i, National Rifle Association of India (NRAI) dang parnok telemteba asadangshitsü mepshia asüngdangogo, aser ashiba agi pa ya taoba ita trok tsüngda India nung trap shooter tem rongnung international scores timtiba anguba asayar lir.

Ajisiüaka federation-i, asayar shimba inyakyim sülen dang anidaksü ta shiogo.

Tebur trap team atema asayar shimdang aliba ya NRAI secretary-general Pawankumar Singh-i ashiba agi, shilem 99 bo meleshitsü, kong Kynan Chenai, Ahvar Rizvi aser Shapath Bhardwaj nung densema lir. Asian Games ya taküm Aichi-Nagoya nung September 19 nungi October 4 tashi asayatsü.

India aser Asia nung trap shooter tem rongnung temaba jenjang nung aliba asayar toktsüba ajanga linük medal angutsü aliba timla makai kumdaksür asü ta asüngdangba mapang pai, "selection policy ya küm ka tejdaang sangdongogo, aser tejak repranger squad nung tenüng melenshira shooting-a tanga asaya den kasa dang akümsü," ta ashi.

"Zoravar züngoksemtsü kangabo timla mali," ta paisa shisem.

Arishi küm 47 tain Zoravar ya World Championships nung medal anguba India nung trap shooter tasembubang lir. Pai taoba küm October ita Athens nung bronze medal ngua liasü. World Cup Finals nunga pa medal round tonga asaya saka tenetbuba nungang tembang.

Jack Draper aser Andy Murray na longjemogo

Monupii/May 13, 2026 (Agencies): British nung tennis asayatem rongnungi No. 2 asayar Jack Draper ano yiruba ajanga season ka junga masayateti ATP rankings nung jenjang mejungi akümba mapang pai pa indang career yanglushitsü atema Andy Murray anisemogo.

Draper-i Mongolbarnü sangdong ka ajanga, ita trok sülen coach Jamie Delgado den pilaba metetdaksüogo aser taruba grass-court season tepeyong coach ama Murray ya pa indang team nung adentsü renema lir, ta metetdaksü

"Ita trok tsüngda Jamie Delgado-i kü atema kechisa inyaksüogo item ajak asoshi kanga pelar," ta Draper-i ashi. "Pa ya world-class coach ka aser nisung tajung ka lir."

"Andy Murray bendenloker LTA nung kü indang team-i kü nem maneni teyari agütsütsü. Murray-i grass-court season tepeyong kü nem teyari agütsütsü," ta paisa shisem.

Grand Slam asem tashi koker aliba aser taoba mapang

world No. 1 asayar Murray ya ita trok atema Novak Djokovic indang coach mapa inyakba sülen tang maneni coach ka ama nung shilem agitsü lir.

Kasa mapang nung arishi küm 24 tain Draper ya 2026 küm yiruba, asayamungtem nung masayatetsüsa akümba aser karakara tsüka asaya-a aruogo. Teka nung timtem adoka ita aika masayatetba sülen Draper meyipa arur asayadar, saka taoba mapang ama masayateti arudar. Pa Monte-Carlo Masters aser Madrid Open na prongla nung masaya aser temekok nung timtem adokba ajanga French Open nunga masayatetsüsa kümogo.

Murray sülen British nung rongnungi Draper ya asayar tajungtiba asütsü ta bilema liasü, saka pa yiruba aser tawa jung masayatetba ajanga world rankings nung jenjang 50bubai asepzüka luogo.

Murray aser Draper na ya Great Britain tenüng nung Davis Cup asayaba mapang nungi junga junga metettepa lir.

BILEMDANGANG

"Taküm nung tamakok aika ajurutsü saka tamakoker ka teküm."